



Kabarett „Sachsenmeyer & Co.“
09224 Chemnitz
Feenweg 11

Hauptspielstätte:
Kabarett-Kiste (im Hedwigshof)
An der Markthalle 8
09111 Chemnitz

Bestell-Telefon: 0371 - 694 77 11
www.sachsenmeyer-kabarett.de
e-Mail: sachsenmeyer@t-online.de

36. Kalenderwoche – ab 6. September 2009

Dor Wähler an sich

Währ is das denne eischendlich - dor Wähler!? Guhd, isch bin eenor, un Sie villeischd ooch, un meine Gudste, un dor Gardnnachbar... also, isch kennde jedzde noch e baar Leide offzähl'n, wo isch weeiß, dass mor die zu de Wähler zähl'n kann. Bloß ehm - wenn "dor Wähler" so wähl'n däde, wie die, die isch als Wähler kenn due, dann kenndn bei de Wahlen niemals solsche Eregbnisse rauskomm! Niemals! Frachn Sie meine Gudste - die is ooch nach jedor Wahl gladd von de Soggn, was dor Wähler widdor gewähl'd had!

Wenn dor Wähler so wähl'n däde wie mir... also, wie die, die isch als Wähler kenn due... da däde de Effdehbee... - nee, isch will ma jedzde gahr nisch sachn, wie mir so ganz gonggrehd wähl'n dun. Nee, unsre Bossidsjohn is ja ooch voll egahl. Dor "Wähler an sich" had immor eene annre!

Dähmzufolsche muss dor "Wähler an sich" sich von unsoreim irschendwie sähr schdarg unnorscheidn. Denn das, was immor rauskomm dud, wenn dor Wähler gewähl'd had, däde nie rauskomm, wenn bloß solsche wie mir gewähl'd hamm dädn. Odor sähn Sie das annersch?

Guhd, Sie dädn villeischd - was de Zweedschdimme bedreffn dud, jemand annersch bevorzuchn, als wie isch, abor so im Großn un Ganzn...?

Genau - dor Wähler muss uns geeschnibor dodahl annersardisch sein! Währ is das also? Wo dud dähr nisdn? Währ sinn die, die de Wahn annersch endscheidn dun, als wie mir? Währ sinn die, die de Mährheidn schaffn dun?

Daderbei isses ja rein madhemahdisch so, dass bloß Mährheidn eene Mährheid hamm kenn.

Wennde Mindorheid bisd, kannsde nisch Mährheid wern. Un mir sinn wahrscheinlich Mindorheid. Mir kenn nischd machn. Mir sinn heeschsens ma das Zinglein an dor Waache. Abor währ dud wägen? Oder heeßd das jedzde - währ dud wagen?

Egahl. Sie wissn, woderdroff isch nauswill - währ dud de Wahl n endscheidn? Mir jednfalls nisch!

Un die, die gahr nisch erschd hingehn zur Wahl - ooch nisch.

Abor wonach dun die wähl, die mor ehm als "Wähler an sich" bezeischnen dud?

Die missn irschendwie nach was wähl, wo mir nisch droff komm. Nach dor Haarfarbe odor nach de greeßdn Ohrn...? Währ weeß!

De Meinungsforschor dun ja nu vorsuchn, dähm Wähler off de Schlische zu komm. Abor die schaffn das ooch nisch. Die Voraussachn, die die machen dun - de sogenanndn Broggnohn! - das is alles bloß Gliggsache. De Meinungsforschor sinn wie das Ohrakl in Delphi - die lieschn meisdens gahr nisch so falsch - un kee Schwein weeß warum.

Dähr "Wähler an sich" folschd wahrscheinlich bei dor Wählorei einem dunklen innoren Driebe. Wählerwanderungen sinn wie Krödnwanderung - unerglährlich un unoffhaldsam!

Eduard Sachsenmeyer